

Ա. ԱԴԱՄՅԱՆ

ՎՐԱՑ ՀԵՐԱԿԼ Բ. ԹԱԳԱՎՈՐԻ ԵՎ ՏՊԱԳՐԻԶ
ՊՈՂՈՍ ՀՈՎՀԱՆՆԻՍՅԱՆԻ ՊԱՅՄԱՆԱԳԻՐԸ

Հայ և վրաց ժողովուրդների բարեկամական սերտ հարաբերությունների վերաբերյալ բավականին հարուստ նյութ կա Հայկական ՍՍՌ Պետ. Մատենագրարանի արխիվի բաժնում: Այդ նյութի մի զգալի մասը մինչև օրս, վրիպելով մասնագետների ուշադրությունից, մնացել է չուսումնասիրված և անտիպ: Այդպիսիներից մեկն է ահա վրաց Հերակլ Բ. Թագավորի (1744—1798) և տպագրության արհեստի հմուտ մասնագետ վարպետ Պողոս Հովհաննիսյանի (Արապյան, 1742—1835) միջև 1781 թվականին կնքված պայմանագիրը՝ Թրիլիսիի վրացական տպարանը վերակառուցելու և շահագործման հանձնելու մասին¹:

Ինչպես հայտնի է, 18-րդ դարի 50-ական թվականներից հետո, Հերակլ Բ. Թագավորի տիրապետության տակ գտնված արևելյան Վրաստանում անտեսությունը, գիտությունը և կուլտուրան ապրեցին վերելքի որոշ շրջան: Հերակլ Բ. Թագավորը հատուկ ուշադրություն դարձրեց նաև վրացական տպագրության վրա, մեծ ջանք գործադրելով հատկապես Թրիլիսիի հին տպարանը վերակառուցելու և շահագործման հանձնելու ուղղությամբ:

Այդ ժամանակ տպագրության արհեստի մեջ ճանաչված վարպետ էր Պողոս Հովհաննիսյանը, որը Կ. Պոլսում ուներ սեփական տպարան և հրատարակչություն:

Վարպետ Պողոսը հայկական տպագրության գործում բացառիկ դեր է խաղացել: Նրա պապը, հայրը, եղբայրները, որդիները և ազգականներից սմանք նույնպես զբաղվել են հայ տպագրության գործով: Սակայն նրանց բոլորի մեջ ամենաընդունակը, ամենաեռանդունը և ամենարեզմնավորը եղել է վարպետ Պողոսը: Նա ժամանակին ճանաչված է եղել որպես լավ փորագրիչ, տառեր ձուլող, տառերի նոր ձևեր հորինող, թռչնակերպ և կենդանակերպ գոպտրիկ գլխատառեր պատրաստող և այլն: Նրա տպարանում տպագրվել են հայերեն, թյուրքերեն և այլ լեզուներով շատ գրքեր: Վարպետ Պողոսի ձեռքի տակ աշակերտել, սովորել և վարպետ են դարձել մի շարք մարդիկ: Նա շատ կարևոր ծառայություն է մատուցել ոչ միայն հայ

¹ Չնայած պայմանագրում նշված է, թե այդ տպարանը նոր է հիմնվում, բայց հավատարի աղբյուրները վկայում են, որ այն հիմնված է եղել 1709 թ., սակայն 1722 թվականից սկսած մատնված է եղել անդործության: Անհրաժեշտ ենք համարում նշել նաև, որ վրացական առաջին տպարանը հիմնվել է 1629 թվականին՝ Հոռոմում, հաջորդը՝ 1705 թվականին՝ Մոսկվայում, ապա 1709 թվականին՝ Թրիլիսիում, իսկ 1737—1744 թվականներին՝ Մոսկվայում և Պետերբուրգում: